

Inatsisissatut siunnersuummut nassuiaatit

Nassuiaatit nalinginnaasut**1. Aallaqqaasiut**

Siunnersuut suliarineqarpoq Inatsisartut aalajangersaanerisa kinguneranik, taanna oqaluuserineqarpoq aalajangiiffiqineqarlunilu UKA 2015/120-tut Inatsisartut ukiakkut ataatsimiinneranni 2015.

Inatsisartut aalajangersaaneranni ersersinneqarpoq Naalakkersuisut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaannut allannguutissatut siunnersuummik saqqummiussinissamut peqquneqartut, taamaasilluni aningaasaateqarfimmi aningaasanik ileqqaakkanik pissarsiat taamaallaat atorineqarsinnaanngortillugit. Siunnersuut Namminersorlutik Oqartussat aatsitassarsiornermik ingerlatsinernut aningaasaliinerannut aamma suliassanut naalagaaffimmit utertitanut aningaasartuutaannut aningaasaateqarfiup aningaasaataasa taamaallaat atorineqarsinnaanerannut qulakkeerinneqataassaaq, tassani malinneqassapput Inatsisartut inatsisaata maleruaqqusai aamma Inatsisartut Aningaasaqarnermut Inatsisaanni imaluunniit ilassutitut aningaasaliissutaanni aalajangersarneqarsimasut. Taamaalilluni siunnersuut malillugu aningaasaateqarfiup aningaasaatai aningaasaliissutininut aamma aningaasartuutininut taaneqartununut matusissutissatut atorineqarsinnaajunnaassapput.

2. Siunnersuummi immikkoortut pingarnerit*2.1. Inatsit atuuttoq*

Sammissami inatsit atuuttoq tassaavoq Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaat nr. 6, 5. december 2008-meersooq, Inatsisartut inatsisaanni nr. 25, 9. december 2015-imeersukkut aamma Inatsisartut inatsisaanni nr. 31, 28. november 2016-imeersukkut allanngortinneqartoq, (matuma kingornatigut taaneqartoq Inatsisartut inatsisaat).

Inatsisartut inatsisaat atuutilerpat Naalakkersuisut Kalaallit Nunaata Aatsitassarsiornermi Aningaasaateqarfiannik pilersitsissapput. Tamanna Inatsisartut inatsisaanni § 1-ip malitsigaa.

Tamatuma kingornatigut Naalakkersuisut isumagissavaat aatsitassarsiornermi isertitat

tamarmik, Inatsisartut inatsisaanni ilaatinneqartut, nunatta karsianit Kalaallit Nunaata Aatsitassarsiornermi Aningaasaateqarfianut nuunneqarnissaat. Tamanna Inatsisartut inatsisaata §§ 3-p aamma 5-ip malitsigaa. Aningaasaateqarfiup pisuussutai nakkutigineqassapput, aamma taamaallaat tunniunneqarsinnaapput atorneqarsinnaallutillu Inatsisartut inatsisaanni maleruaqqusat malillugit.

Inatsisartut inatsisaanni § 2, imm. 1-imi erserpoq siunertaasoq tassaasoq Namminersorlutik Oqartussat aatsitassanit isertitai inissinneqartassasut kiisalu aatsitassanit isertitat atorneqarnissaanni siunissaq ungasinnerusooq eqqarsaatigalugu tunngavissaqartinneqartassasut.

Tamanna malillugu Inatsisartut inatsisaannut oqaaseqaatini erserpoq aningaasaateqarfiup siunertaani qulakkeerniarneqartoq aatsitassarsiornermit isertitat Kalaallit Nunaata aningaasarsiornerata patajaatsumik imminullu nammassinnaasumik ineriartortinneqarnissaa siunertarineqarluni, ukiuni ataasiakkaani isertinneqartartunit isumalluuteqanngitsumik.

Aningaasaateqarfiup pilersinneqarnerani taamatuttaaq siunertaavoq Kalaallit Nunaata aatsitassarsiornermit isertitaasa Kalaallit Nunaata aningaasaqarnerani pingaarnertit siunissamullu eqqarsaatiginnittumik atorneqarnissaannik tunngaviliisuussasut, siunissami kinguaariinnut aamma iluaqutaasussamik.

Inatsisartut inatsisaata § 2, imm. 2, normu 3-p malitsigisaanik aningaasaateqarfiup aningaasaatai Namminersorlutik Oqartussat aatsitassarsiornermik sammisaqarnermi aningaasalersuinerannut aamma suliassat utertinneqartut isumagineqarnerannut aningaasartuutitut kiisalu aatsitassarsiornermik sammisaqarnermi aningaasartuutitut matussusiinissanut atorneqassapput Inatsisartut inatsisaanni malittarisassat malillugit kiisalu Inatsisartut aningaasanut inatsisaanni imaluunniit ilassutitut aningaasaliissutini Inatsisartut akuerisaat naapertorlugit.

Inatsisartut inatsisaata § 2, imm. 2, nr. 4-p malitsigisaanik aningaasaateqarfiup aningaasaatai tamakku saniatigut Namminersorlutik Oqartussanut taamaallaat tunniunneqarsinnaasut Inatsisartut inatsisaanni malittarisassat malillugit kiisalu Inatsisartut aningaasanut Inatsisaanni imaluunniit ilassutitut aningaasaliissutit Inatsisartut akuerisaat naapertorlugit. Tassani atuuppoq ataatsimoortumik killiliineq, tassa aningaasaateqarfik qulakkeerrinnermut peqataassasoq aningaasaateqarfiup aningaasaataasa imatut atorneqarnissaannut Kalaallit Nunaanni inuiaqatigiit siunissami ungasinnerusumi inuiaqatigiit aningaasarsiorneranni sapinngisamik amerlanerpaanik iluanaaruteqartinnissaat sapinngisamillu iluaqutaanerpaamik sunniuteqartinneqassallutik. Tamatumani malinneqarpoq § 2, imm. 2, nr. 5.

Inatsisartut inatsisaanni § 2, imm. 2, nr. 3-mit 5-imut oqaasertaliornertit maannakkut atituujuupput, tassani eqqarsaatigigaanni aningaasaateqarfiup aningaasaataanit sunut

anigaasaliissutit aamma anigaasartuutit tamakkerlugit imaluunniit ilaannaat matussuserneqarsinnaassanersut. Tamatuma kingunerisaanit ilaatigut nalorninarsinnaavoq anigaasaateqarfiup anigaasaataasa tunniunneqarnerat aamma atorneqarnerat eqqunngitsumik pisinnaasoq aamma Inatsisartut inatsisaanni ataatsimoortumik siunertaq mianerisassallu eqqortinneqarnatik. Aalajangersakkani taaneqartuni oqaasertaliornert, tamatumani pingaartumik Inatsisartut inatsisaanni § 2, imm. 2, nr. 3-p, kingunerisinnaavaa anigaasaateqarfiup anigaasaataasa nungukkiartornerat, tassa anigaasaateqarfiup anigaasaatai tunniunneqarsinnaammata aamma atorneqarsinnaammata anigaasaliissutinut aamma anigaasartuutinut Inatsisartut inatsisaanni § 2, imm. 2, nr. 3-mi taaneqartutut.

Inatsisartut inatsisaanni § 30 naapertorlugu anigaasaateqarfiup anigaasaatai pigisatut nalilittut Kalaallit Nunaata avataanut inissinneqassapput, tassa najoqqutanut ernialersorneqarsinnaasunut (75 – 85 %) aamma najoqqutanut namminerisamik anigaasaatigisanut tunngasunut (15 – 20 %).

2.2. Siunnersuut

Siunnersuummi ataatsimut isiginnilluni immikkoortinneqarput anigaasaateqarfiup anigaasaataanik tunniussineq aamma anigaasaateqarfiup anigaasaataanit pissarsianik tunniussineq. Ataatsimoortumik innersuussutigineqarput immikkoortut 2.2.1. aamma 2.2.2 matuma kinguliani.

Siunnersuummi § 1, nr. 5, (§ 3, imm. 7) tunngavigalugu pissarsiat imatut paasineqassapput **pissarsiat** tassaasut anigaasat pisissutaasinnaanerisa nalikillinerisa kingornatigut pissarsiat nalingi (pissarsiaviit), tassa anigaasaateqarfiup anigaasaataanit ukiumi anigaasanut inatsiseqarfiusumi ataatsimi arlalinniluunniit pissarsiat, taakkunanga ilanngaatigalugit ukiumi anigaasanut inatsiseqarfiusumi pineqartumi imaluunniit ukiuni anigaasanut inatsiseqarfiusumi pineqartuni anigaasaateqarfimmi allaffissornermut aamma ingerlatsinermut anigaasartuutaasut. Ataatsimut innersuussutigineqarput aalajangersagaq taaneqartoq aamma tassunga nassuiaatit.

2.2.1 Anigaasaateqarfiup anigaasaataanit pissarsianik tunniussineq

Siunnersuutip aaqqissuunneqarnera anigaasaateqarfiit nungunneqarsinnaasunik isumalluuteqartut anigaasaliissuteqartarnerannut maleruaqqusaq malippaa, taanna professor John M. Hartwickip 1977-imi saqqummiuppaa (Hartwickip maleruaqqusaatut taaneqartartoq). Ilaatigut Hartwickip maleruaqqusaa Anigaasaqarnermut Siunnersuisooqatigiit 2012-imi septembarimi nalunaarusiaanni immikkoortoq 3.3.1-imi pinngortitami isumalluutit aamma pisuussutinik pissarsiat allaaserineqarneranni taaneqarpoq.

Isumalluutit nungunneqarsinnaasut, soorlu assersuutigalugu tassaasinnaapput pinngortitami pisuussutit, assersuutit soorlu aatsitassat. Hartwickip maleruaqqusaani aallaavigineqarpoq isumalluutip nungunneqarsinnaasup nungukkiartornerani sinneqartoorutit (pisuussutinit iluanaarutit) nalilinnut aalajangersimasunut aningaasaliissutigineqassasut, taamaaliornikkut qulakkeerneqassaaq inuiaqatigiinni atuinerup aamma atugarissaarnerup piffissap ingerlanerani qaffasissusiata taamaaginnarnissaa. Isumalluut nungunneqartoq, (pinngortitamit aallaaveqartumik aningaasaatigineqartut) taamaalillutik ataatsimut isigalugit pisuussutinik iluanaarutinit taarserneqassapput, taakkulu naliliutinut aalajangersimasunut aningaasaliissutigineqarsinnaapput (aningaasaliinermi aningaasat), kiisalu siunissami kinguaariinnit atorluarneqarsinnaallutik. Isumalluutit erniaat aningaasaliissutigineqassapput sapinngisamik pisuussutit katillugit, pinngortitamit aningaasaatit aamma aningaasaliinermi aningaasaatit katinnerat, allanngortinnaveersaarniarlugit.

Hartwickip maleruaqqusaa malillugu imaanngilaq siunissami kinguaariit mianerineqarnerisigut iluaqutit aalajangersimasut pigiinnassagaat, ilaatigut soorlu assersuutigalugu pinngortitami isumalluutit assigiinngitsut, kisianni akerlianik tassani apequtaavoq siunissami kinguaariit periarfissinneqarnissaat inuiaqatigiinnik qulakkeerininnissamut atuinermik aamma atugarissaarnermik pilersitsinissaminnut. Pisuussutit katillugit inuiaqatigiinni kinguaariit kinguaariinnut tullinnguuttunut tunniussaat, taamaalillutik kinguaariit taakku kinguaariinnit siuliminnit pisuussutinit pissarsiarisimasaanniit annikinnerussanngillat.

Siunnersuutip aaqqissuussaanera ilaatigut norgemiut uuliamik aningaasaateqarfiata (Statens Pensjonsfond utland) aaqqissuussaaneranut pingaarutilitsigut assinguvoq. Norgemiut uuliamut aningaasaateqarfiat pillugu inatsimmi aningaasaateqarfiup aningaasaataasa erniaat taamaallaat aningaasaliissutinut aamma aningaasartuutinut assigisaannullu matusissutissatut atorneqarsinnaapput.

Siunnersuutip immikkut siunertarivaa siunissami kinguaariit soqutigisaasa illersorneqarnissaat, tassa aningaasaateqarfiup aningaasaataasa pissutsini immikkut ittuni taamaallaat tunniunneqarsinnaanngorlugit, kiisalu taamaaliornikkut aningaasaateqarfiup aningaasaatai ataatsimut isigalugu ileqqaarneqassasut nungukkiartuaarnagit. Taamaattumik pingaarnepaavoq aningaasaateqarfiup piviusumik nalingata piffissap ingerlanerani ataannarnissaa.

Siunnersuut allannguutinik kinguneqassanngilaq aningaasaliinerit aamma aningaasartuutit suut matussuserneqaaqusaanersut eqqarsaatigalugit, Inatsisartut inatsisaanni § 2, imm. 2, nr. 3-mi aalajangersakkat naapertorlugit, siunnersuummi allanngortinneqartoq.

2.2.2 Aningaasaateqarfiup aningaasaataanik tunniussineq

Siunnersuut naapertorlugu aningaasaateqarfiup aningaasat ileqqaagai (aningaasaateqarfiup toqqortaatai) Namminersorlutik Oqartussat aatsitassarsiornermi ingerlatsinernut aningaasaliissutaannik aamma suliassanut utertinneqartunut matussusiinissamut tunniunneqassanngillat, Inatsisartut inatsisaanni maleruaqqusat malillugit aamma Inatsisartut Aningaasanut Inatsisaannik imaluunniit ilassutitut aningaasaliissutinik akuersissuteqarnerit naapertorlugit, Inatsisartut inatsisaanni § 2, imm. 2, nr. 3-imi, siunnersuummi allanngortinneqartutut. Ataatsimoortumik siunnersuummi § 1, nr. 2 (§ 2, imm. 2, nr. 3) aamma tassunga oqaaseqaatit innersuussutigineqarput.

Siunnersuummi § 1, nr. 2 (§ 2, imm. 2, nr. 3) taaneqartut eqqarsaatigissanngikkaani, taava aningaasaateqarfiup aningaasat toqqortaatai maannakkutut tunniunneqarsinnaapput. Ataatsimoortumik innersuussutigineqarput Inatsisartut inatsisaanni § 2, imm. 2, nr. 3-5 aamma Inatsisartut inatsisaanni §§ 6 – 8 siunnersuummi allanngortinneqartutut aamma tassunga oqaaseqaatit.

Aningaasaateqarfiup aningaasanit toqqortaataanit piumasaqaatit sukumiinerusumik taaneqartut, soorlu assersuutigalugit naalagaaffiup Namminersorlutik Oqartussanut tapiissutaasa ikilineqarnerannut matusissutissatut tunniussisoqarsinnaavoq, tassani malinneqassaaq Namminersorlutik Oqartussat aatsitassarsiornermit isertitaqarsinnaanermut aamma tapiissutinik pisinnaatitaaffiat pillugu inatsit. Tamatumani Inatsisartut inatsisaanni § 7 malinneqarpoq.

Naalagaaffiup tapiissutaanik annikillissutaajunnartut aningaasaateqarfiup aningaasaataasa toqqortaatai atorlugit aningaasalersorneqassapput. Tapiissutinit annikillisaataajunnartut aningaasalersorneqassapput ukiunik 2-nik nikingasumik, taamaaliornikkut aningaasaateqarfik piffissami tassani aningaasaatinit pissarsiaqarnermik angusaqarsinnaassaaq, tamatuma kingorna tapiissutit annikillisinneqarnerannut nalimmassaatitut atorneqarsinnaasunik.

Aningaasaateqarfiup aningaasaatai naalagaaffiup tapiissutaasa annikillisinneqarnerannut matusissutissatut tunniunneqarsinnaapput, naak aningaasat amerlassusiisa tunniunneqartut, aningaasaateqarfiup aningaasaataanit pissarsiat sinnersimagaluaaraat. Siunnersuummi § 1, nr. 9, (§ 6, imm. 3 aamma 4) aningaasaateqarfiup aningaasaataanit tunniussinermut atatillugu atuutinngillat.

2.2.3 Aningaasaateqarfiup aningaasaataanit inissiineq

2.2.3 Aningaasaateqarfiup aningaasaataanit inissiineq

Siunnersuummi § 1, nr. 13-imi (§ 30, imm. 2) aalajangersarneqarput aningaasaateqarfiup aningaasaataanik inissiinissamut maleruaqqusat nutaat. Aalajangersagaq naapertorlugu

aningsaateqarfiup aningsaatai maannamut naleqqiussilluni saassussilluni aningsaliissutigineqassapput

Siunnersuummi ilaatigut aallaavigineqarpoq aningsaateqarfimmi aningsaatinik aningsaliissuteqartarnermut aqqissuussineq, norgemiut uuliamut aningsaateqarfianni atorpeqartoq (Statens Pensjonsfond utland). Norgemiut uuliamut aningsaateqarfiani aningsaateqarfiup piffissamut ungasinnerusumut periarfissai aamma malunnaateqarluartumik annertussusia atorluarniarneqarput, tassa qaffasissumik iluanaaruteqarnissamut kiisalu siunissami kinguaariinnut sapinngisamik pitsaanerpaamik naliliutinik qulakkeerinninnissamut. Norgemiut uuliamut aningsaateqarfiata aningsaataasa aningsaliissutigineqartarnerat imatut agguataarneqarpoq; Aningsaateqarfiup aningsaataasa 60 %-ii aktianut aningsaliissutigineqartarput, aningsaateqarfiup aningsaataasa 35-40 %-ii pappiaqqanut ernialersorneqartartunut aningsaliissutigineqartarput (obligationit), kiisalu aningsaateqarfiup aningsaataasa 5 %-ii angullugit illunut aningsaliissutigineqartarlutik. Aningsaliissuteqartarnerit Norgep avataani nunarsuaq tamakkerlugu ingerlanneqarput.

Norgemiut uuliamut aningsaateqarfiat assigalugu Kalaallit Nunaata Aatsitassarsiornermi Aningsaateqarfia piffissamut ungasinnerusumut periarfissaqarpoq. Taamaattumik aningsaateqarfiup iluaqutaasumik ataatsimut isiginnilluni aningsaliisarnernut saassussilluni aningsaliisarsinnaavoq, taamaaliornikkut anguniarniarlugu sapinngisamik aningsaateqarfiup aningsaataanik iluanaaruteqarsinnaaneq.

Taamaattumik siunnersuutigineqarpoq Kalaallit Nunaata Aatsitassarsiornermi Aningsaateqarfiata aningsaataasa aningsaliissutigineqartarnissaat imatut agguataarneqassasut: Aningsaateqarfiup aningsaataasa 60-70 %-ii aktianut aningsaliissutigineqartassasut, aningsaateqarfiup aningsaataasa 25-35 %-ii pappiaqqanut ernialersorneqartartunut aningsaliissutigineqartassasut (obligationit), kiisalu aningsaateqarfiup aningsaataasa 5 - 8 %-ii illunut aningsaliissutigineqartassallutik.

Aningsaliissutit maannakkutut nalilinnut Kalaallit Nunaata avataaniittunut aningsaliissutigineqartassapput, tak. Inatsisartut inatsisaat § 30, imm. 1.

2.2.4 Aningsaateqarfiup aqunneqarnera allaffissornerlu

Siunnersuummi ilaavoq § 1, nr. 16 (§ 51) ikaarsaariarnermi aalajangersagaq, tassani ilaapput immikkut maleruaqqusat aningsaateqarfiup aqunneqarneranut aamma allaffissornermut tunngassuteqartut, Inatsisartut inatsisaata atuuttunngortinneqarnerata kingornatigut piffissami sivikinnerusumi sivisunerusumiluunniit atuutsinneqartussat, aningsaateqarfiup pisuussutaasa suli amerlanngikkallarneranni.

Piffissami sivikinnerusumi imaluunniit sivisunerusumi Inatsisartut inatsisaata atuuttussanngortinneqarnerata kingornatigut aningaasaateqarfiup pisuussutai aamma aatsitassarsiornermi isertitassat amerlavallaannginnissat naatsorsuutigineqarpoq. Taamaattumik naatsorsuutigineqarpoq piffissami tassani aningaasaateqarfimmit aqutsineq, ingerlatsineq aamma allaffissornerq annikinnerussasut, Inatsisartut inatsisaanni kapitali 7-ip malitsigisassaa tunngavigalugu. Ataatsimut isiginnilluni aaqquissuussinerup taamaattup peqataaffigissavaa aningaasaateqarfiup aqutsinermut, ingerlatsinermut aamma allaffissornermut aningaasartuutaasa aningaasaateqarfiup pisuussutaasa annertussusianut naleqqiussilluni naammaginartumik annertussuseqarnissaat.

Taamaattumik siunnersuummi § 1, nr. 16 (§ 52) aalajangersakkanik imaqarpoq aningaasaateqarfimmit aqutsinermik, ingerlatsinissamik aamma allaffissornermik annertunnginnerusumik ingerlatsinissamut tunngasunik. Aalajangersakkat atuutsinneqassapput 31. decembarip tungaanut ukiumi tassaasumi, piumasaqaatit tulliuttut 2 siullerpaamik naammassineqarfigisaasa tungaanut:

- 1) Aningaasaateqarfiup pisuussutaasa 1 milliardit sinnerpatigit.
- 2) Aningaasaateqarfiup aningaasaataanit ukiumut iluanaarutit 50 millionit koruuninit amerlanerulerpata.

Aatsaat piumasaqaatit 2 taaneqartut marluutillugit naammassineqareerpata siulersuisut aamma allatseqarfik Inatsisartut inatsisaanni kapitali 7-imi maleruaqqusat malillugit pilersinneqassapput. Tamatuma tungaanut aningaasaateqarfimmit aqutsineq, ingerlatsineq allaffissornerlu Naalakkersuisunit isumagineqassapput siunnersuummi § 52 naapertorlugu. Ataatsimoortumik innersuussutigineqarput aalajangersagaq taaneqartoq aamma tassunga oqaaseqaatit.

Inatsisissatut siunnersuut Inatsisartut inatsisaannut atuuttumut sanilliullugu	
<i>Oqaaseqatigiit atuuttut</i>	<i>Siunnersuut</i>
	§ 1 Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni nr. 6, 5. december 2008-meersumi, Inatsisartut inatsisaanni nr. 25, 9. december 2015-imeersukkut allanngortinneqartumi, ima allannguuteqartoqassaaq:
	1. Inatsisartut Inatsisaata danskisuuani sumiluunniit “landstingsfinanslov”

	<p>allanngortinneqassaaq imaalillugu: “Inatsisartutfinanslov”, “landstingsfinanslove” allanngortinneqassaaq imaalillugu: “Inatsisartutfinanslove”, “landstingsfinansloven” allanngortinneqassaaq imaalillugu: “Inatsisartutfinansloven” aamma “Landstingsfinansloven” allanngortinneqassaaq imaalillugu: “Inatsisartutfinansloven”.</p>
<p>3) qularnaarneqassaaq aningaasaateqarfiup aningaasaatai namminersornerusut aatsitassarsiornermik sammisaqarnermi aningaasalersuinerannut kiisalu aatsitassarsiornermik sammisaqarnermi aningaasartuutitut matussusiinissanut atorneqassallutik inatsisartut inatsisaanni matumani malittarisassat malillugit kiisalu Inatsisartut aningaasanut inatsisaanni imaluunniit ilassutitut aningaasaliissutini Inatsisartut akuerisaat naapertorlugit,</p>	<p>2. § 2, imm. 2, nr. 3, ima oqaasertalerneqassaaq: “3 Inatsisartut inatsisaanni matumani maleruaqqusat aamma Inatsisartut aningaasanut inatsisai imaluunniit ilassutitut aningaasaliissutai aalajangersarneqartut naapertorlugit aningaasaateqarfiup aningaasaataasa Namminersorlutik Oqartussat aatsitassarsiornermut aningaasaliissutaannut, aatsitassarsiornermut aningasartuutaanut aamma suliaasanut naalagaaffimmit utertinneqartunut aningaasartuutaannut matussusiissutitut atorneqassasut qulakkiissallugu .”</p>
<p>4) tamakku saniatigut qulakkeerneqassaaq aningaasaateqarfiup aningaasaatai taamaallaat namminersornerusunut tunniunneqarsinnaasut inatsisartut inatsisaanni matumani malittarisassat malillugit kiisalu Inatsisartut aningaasanut inatsisaanni imaluunniit ilassutitut aningaasaliissutit Inatsisartut akuerisaat naapertorlugit, aammalu</p>	<p>3. § 2, imm. 2, nr. ima oqaasertalerneqassaaq: ”4 Inatsisartut inatsisaanni matumani maleruaqqusat malillugit aamma inatsisartut aningaasanut inatsisaanni imaluunniit ilassutitut aningaasaliissutini akuersissutigineqartut malillugit aningaasaateqarfiup aningaasaatai aamma aningaasaateqarfiup aningaasaataanit pissarsiat tamatuma saniatigut taamaallaat</p>

	Namminersorlutik Oqartussanut akilerneqartassasut qulakkiissallugu, aamma”
5) qulakkeerinneqataassalluni aningaasaateqarfiup aningaasaatai ima atorneqassasut, Kalaallit Nunaanni inuiaqatigiit siunissami ungasinnerusumi inuiaqatigiit aningaasarsiorneranni sapinngisamik amerlanerpaanik iluanaaruteqartinnissaat sapinngisamillu iluaqutaanerpaamik siunniuteqartinneqassallutik.	4. § 2, imm. 2, nr. 5 ima oqaasertalerneqassaaq: ”5) piffissaq ungasinnerusq eqqarsaatigalugu inuiaqatigiit aningaasaqarneranni pissarsiat sapinngisamik annertunerpaat aamma sunniutissat sapinngisamik iluaqutaanerpaat inuiaqatigiinnit kalaallinit anguneqarnissaannut aningaasaateqarfimmi aningaasaatit kiisalu aningaasaateqarfiup aningaasaataanit pissarsiat atorneqarnissaannut qulakkeerinninnermut peqataassasut.”
	5. § 3, imm. 6-ip kingornatigut immikkoortoq nutaaq ilanngunneqassaaq: “ Imm. 7. Pissarsiatut paasineqassapput aningaasaateqarfiup aningaasaataasa ukiumi aningaasanut inatsiseqarfiusumi ataatsimi arlalinniluunniit naleerukkiartornerisa kingorna ukiumi aningaasanut inatsiseqarfiusumi pineqartumi imaluunniit pineqartuni aningaasaateqarfiup allaffissorneranut ingerlanneranullu ilanngaateqareerluni pissarsiat nalinginnaasut (pissarsiaviit).”
§ 4. Aningaasaateqarfiup pisuussutai ima amerliartortinneqassapput:	6. § 4-mi imm. 1 Inatsisartut inatsisaata danskisuuani ”Fonden formue opbygges af” allanngortinneqassaaq imaalillugu:”Fondens

	formue opbygges af”
	7. Namminersorlutik Oqartussat aatsitassanik isertitaat.
<i>Aningaasaateqarfiup aningaasanik Namminersornerusunut nuussisarnera</i>	7. <i>Kapitali 4-mi kapitalip qulequtaa ima oqaasertalerneqassaaq:</i> <i>”Aningaasaateqarfimmi aningaasaanik aamma aningaasaanit pissarsianit Namminersorlutik Oqartussanut nuussisarneq”</i>
<p>§ 6. Naalakkersuisut isumagissavaat Inatsisartut aningaasanut inatsisaannut aamma landskarsip naatsorsuutaanut atasumik immikkut aamma isumagissallugit Namminersornerusut aatsitassarsiornermi sammisaanut aningaasaliissutit, aatsitassarsiornermi sammisani aningaasartuutit kiisalu suliassat tiguneqarsimasut isumaginerinut aningaasartuutit ukiumut aningaasarsiorfiusumut ilanngutissallugit.</p> <p><i>Imm. 2.</i> Aningaasaateqarfiup isumagissavaa, imm. 1-imi aningaasaliissutit aningaasartuutitullu taaneqartut inatsimmi matumani malittarisassat naapertorlugit kiisalu inatsisartut aningaasanut inatsisaanni imaluunniit ilassutit aningaasaliissutinik Inatsisartut akuersisimanerat naapertorlugu aningaasaateqarfiup aningaasaataannit matuneqarnissaat.</p>	<p>8. § 6, <i>imm. 2.</i> Ima oqaasertalerneqassaaq:</p> <p>“ <i>Imm. 2.</i> Aningaasaateqarfiup isumagissavaa Namminersorlutik Oqartussat aningaasaliissutaat aamma aningaasartuutaat imm. 1-imi taaneqartut aningaasaateqarfiup aningaasaataanit pissarsianit matussuserneqartarnissaat, maleruaqqusat Inatsisartut Inatsisaaniittut malillugit kiisalu Inatsisartut aningaasanut inatsisaanni imaluunniit ilassutit aningaasaliissutinik akuersissuteqarsimanerit naapertorlugit, taamaattorli tak. imm. 3 aamma 4.”</p>
<p>§ 6. Naalakkersuisut isumagissavaat Inatsisartut aningaasanut inatsisaannut aamma landskarsip naatsorsuutaanut</p>	9. § 6-imi <i>imm. 2-p</i> kingornatigut immikkoortutut nutaatut ilanngunneqassapput:

<p>atasumik immikkut aamma isumagissallugit Namminersornerusut aatsitassarsiornermi sammisaanut aningaasaliissutit, aatsitassarsiornermi sammisani aningaasartuutit kiisalu suliassat tiguneqarsimasut isumaginerinut aningaasartuutit ukiumut aningaasarsiorfiusumut ilanngutissallugit.</p> <p>Imm. 2. Aningaasaateqarfiup isumagissavaa, imm. 1-imi aningaasaliissutit aningaasartuutitullu taaneqartut inatsimmi matumani malittarisassat naapertorlugit kiisalu inatsisartut aningaasanut inatsisaanni imaluunniit ilassutit aningaasaliissutinik Inatsisartut akuersisimanerat naapertorlugu aningaasaateqarfiup aningaasaataannit matuneqarnissaat.</p> <p>Imm. 3. Aningaasaateqarfiup aningaasaatai imm. 1-imi taaneqartut aningaasaliissutinut aningaasartuutinullu matussusiinissanut atorneqassappata, aningaasaateqarfiup isumagissavaa, aningaasat aningaasaateqarfimmit landskarsimut nuunneqarnissaat kingusinnerpaamik inatsisartut aningaasanut inatsisaata imaluunniit ilassutit akuerineqarnerannit qaammatit marluk qaangiutsinnagit, siusinnerpaamilli ukiumi aningaasarsiorfiusumi pineqartumi ulloq 1. januar. Aningaasaqarnermut niuernermullu tunngasut, ilaallutik aningaasaateqarfiup aningaasaataanik aqutsinermut aningaasalersuinermullu tunngassutillit ajornartitsinnagippata, Naalakkersuisut aningaasaateqarfiup siulersuisuisa</p>	<p>“Imm. 3. Aningaasaateqarfik ukiumi aningaasanut inatsiseqarfiusumi taamaallaat Namminersorlutik Oqartussanut pissarsianik imm. 2 malillugu tunniussisinnaavoq Namminersorlutik Oqartussat ukiumi aningaasanut inatsiseqarfiusumi aningaasaliinerannut aamma aningaasartuutaannut imm. 1-imi taaneqartunut matusissutissatut. Tamatuma saniatigut imm. 2 malillugu aningaasaateqarfik Namminersorlutik Oqartussanut ukiumi aningaasanut inatsiseqarfiusumi pissarsianik tunniussisinnaanngilaq, ukiumi aningaasanut inatsiseqarfimmi pineqartumi pissarsiat katillugit ukiumi aningaasanut inatsiseqarfiusuni kingullerni tallimani ukiumut agguaqatigiissillugu pissarsiat angunngippagit, taamaattorli tak. imm. 4.</p> <p>Imm. 4. Naalakkersuisut aalajangersaasinnaapput aningaasaateqarfiup pissarsiaanik imm. 2 aamma 3 malillugit Namminersorlutik Oqartussanut tunniussinissanut, imatut annertussuseqartunik ukiumi aningaasanut inatsiseqarfiusumi aningaasat katillugit tunniunneqartut, katillugit pissarsianit annertunerussanngillat, tassa ukiumi kingullerni 5-ini isertitarineqarsimasunit aamma Namminersorlutik Oqartussanut tunniunneqarsimanngitsunit ukioq aningaasanut inatsiseqarfiusoq pineqartoq sioqqullugu.”</p> <p>Tamatuma kingornatigut <i>imm. 3-6</i> tassaalerput imm. 5-8.</p>
---	---

inassuteqarnerisigut aalajangersinnaapput,
nuussinissamut killigititaq
kingusinnerusumut
kinguartinneqarsinnaasoq, taamaattorli
inatsisartut aningaasanut inatsisaata
imaluunniit ilassutitut aningaasaliissutit
akuerineqarnerannit qaammatinik arfinilinnik
kingusinnerusinnaanani.

Imm. 4. Namminersornerusut
aatsitassarsiornermik sammisanut
aningaasaliissutaat,
aatsitassarsiornermik sammisanut
aningaasartuutaat kiisalu suliassat
tiguneqartut isumaginerannut
aningaasartuutit ukiumi
aningaasaliiffiusumi inatsisartut
aningaasanut inatsisaanni imaluunniit
ilassutitut aningaasaliissutini
missingersuusiorneqarsimasunit
ikinneruppata, aningaasat
nikingassutaasut amerlaqataat
landskarsimit aningaasaateqarfimmut
nuunneqassapput.

Imm. 5. Landskarsip
aningaasaateqarfiullu akornanni
aningaasanik imm. 4 malillugu
nuussineq siulersuisut aamma
Naalakkersuisut
isumaqatigiinnerisigut pissaaq,
taamaattorli ukiumi
aningaasaliiffiusumi landskarsip
naatsorsuutaasa
akuersissutigineqareernerini
qaammatinit 6-init kingusinnerusumi
pisinnaanani.

Imm. 6. Landskarsip aamma
aningaasaateqarfiup akornanni

<p>anigaasanik nuussineq, Namminersornerullutik Oqartussat missingersuusiortarnerat pillugu inatsit aamma Inatsisartut Anigaasanut inatsisaat mianeralugit aatsaat pisinnaavoq.</p>	
<p><i>Imm. 3.</i> Anigaasaateqarfiup anigaasaatai imm. 1-imi taaneqartutut anigaasaliissutinut anigaasartuutinullu matussusiinissanut atorneqassappata, anigaasaateqarfiup isumagissavaa, anigaasat anigaasaateqarfimmit landskarsimut nuunneqarnissaat kingusinnerpaamik inatsisartut anigaasanut inatsisaata imaluunniit ilassutitut akuerineqarnerannit qaammatit marluk qaangiutsinnagit, siusinnerpaamilli ukiumi anigaasarsiorfiusumi pineqartumi ulloq 1. januar. Anigaasaqarnermut niuernerullu tunngasut, ilaallutik anigaasaateqarfiup anigaasaataanik aqutsinermut anigaasalersuinermullu tunngassutillit ajornartitsinnagippata, Naalackersuisut anigaasaateqarfiup siulersuisuisa inassuteqarnerisigut aalajangersinnaapput, nuussinissamut killigititaq kingusinnerusumut kinguartinneqarsinnaasoq, taamaattorli inatsisartut anigaasanut inatsisaata imaluunniit ilassutitut anigaasaliissutit akuerineqarnerannit qaammatinik arfinilinnik kingusinnerusinnaanani.</p>	<p>10. § 6, imm. 3, imm. 5-inngortoq ima oqaasertalerneqassaaq:</p> <p><i>“Imm. 5</i> Anigaasaateqarfiup anigaasaataanit pissarsiat imm. 1-imi anigaasaliinernut anigaasartuutinullu taaneqartunut matussissutitut atorneqarnerat ilutigalugit, taava anigaasaateqarfiup isumagissavaa anigaasaateqarfimmit pissarsiat Nunatta Karsianut nuunneqarnissaat Inatsisartut Anigaasanut Inatsisaata imaluunniit ilassutitut anigaasaliissutit akuersissutigineqareernerisa kingornatigut kingusinnerpaamik qaammatit marluk qaangiunneranni, taamaattorli ukiumi anigaasanut inatsiseqarfiusumi pineqartumi siusinnerpaamik 1. januaarimi. Anigaasaqarnermut imaluunniit niuernermut tunngassuteqartut, tamatumunnga ilanngullugit pissutsit ingerlatsinermut aamma anigaasaateqarfiup anigaasaataanit aamma anigaasaateqarfiup anigaasaataanit pissarsianit anigaasaliissuteqarnermut tunngasut, tamanna pisinnaatippassuk, taava Naalackersuisut anigaasaateqarfiup siulersuisuisa inassuteqaataat naapertorlugu aalajangersarsinnaavaat, nuussinerup kingusinnerusukkut pisinnaanera, taamaattorli Inatsisartut Anigaasanut Inatsisaata imaluunniit ilassutitut anigaasaliissutit akuersissutigineqareernerisa kingornatigut</p>

	qaammatinit 6-init kingusinnerunngitsumik.
<p>§ 7. § 6-imi taaneqartut eqqaassanngikkaanni aningaasaateqarfiup aningaasaatai inatsisini malittarisassat malillugit kiisalu inatsisartut aningaasanut inatsisaanni imaluunniit ilassutitut aningaasaliissutini Inatsisartut akuerisimasaat naapertorlugit taamaallaat Namminersornerusunut akilerneqarsinnaapput, takuulli imm. 2.</p> <p><i>Imm. 2.</i> Aningaasaateqarfiup aningaasaatai Namminersornerusunut akilerneqarsinnaanngillat Namminersornerusut ukiormi aningaasarsiorfiusumi aatsitassanit isertitaat perngaammik ima amerlatigilernerat, namminersorneruneq pillugu inatsit naapertorlugu Namminersornerusut aatsitassanit isertitanik ataatsimullu aningaasaliissutinik pissarsisinnaanerit pillugu naalagaaffiup Namminersornerusunut ataatsimut aningaasaliissutaannik ikilisitsinermik kinguneqalernissaat sioqqullugu. Piffissap taassuma kingorna aningaasaateqarfiup aningaasaatai taamaallaat Namminersornerusunut tunniunneqarsinnaapput, ukiumi aningaasarsiorfiusumi Namminersornerusut aatsitassanit isertitaat naalagaaffimmit Namminersornerusunut ataatsimut aningaasaliissutaannik ikilisitsinermik kinguneqarpata, takuulli imm. 3.</p> <p><i>Imm. 3.</i> Ukiumi naatsorsuiffiusumi, naatsorsuiffiusuniluunniit missingersuusiorfinniluunniit tulleriinni, - Namminersornerullutik Oqartussat, aatsitassarsiornermit aningaasatigut iluanaarutaat, perngaammik ima amerlatigilerpata, Qallunaat Naalagaaffianit ukiumut Nunatta Karsianut tapiissutinit amerlaningorlutik, - taava Aningaasaateqarfiup toqqortaanik, Namminersornerullutik Oqartussanut</p>	<p>11. § 7-imi imm. 1-4 ima oqaasertalerneqassapput:</p> <p>§ 6-imi taaneqartut eqqaassanngikkaanni aningaasaateqarfiup aningaasaatai aamma aningaasaateqarfiup aningaasaataanit pissarsiat Namminersorlutik Oqartussanut taamaallaat akilerneqarsinnaapput Inatsisartut inatsisaanni matumani maleruqqusat malillugit aamma Inatsisartut Aningaasanut Inatsisaasa imaluunniit ilassutitut aningaasaliissutaasa akuersissutigineqarneri tunngavigalugit, taamaattorli tak. imm. 2.</p> <p><i>Imm. 2.</i> Aningaasaateqarfiup aningaasaatai aamma aningaasaateqarfiup aningaasaataanit pissarsiat Namminersorlutik Oqartussanut akilerneqassanngillat piffissaq tassaasoq, Namminersorlutik Oqartussat ukiumi aningaasanut inatsiseqarfiusumi aatsitassanit isertitaat siullermeertumik ima annertussuseqalersimatigippata, tamatuma kinguneralugu Namminersorlutik Oqartussanut naalagaaffimmit ataatsimoortumik tapiissutit ikilisinneqarlutik, tassa Namminersorlutik Oqartussat aatsitassanit isertitaat aamma ataatsimoortumik tapiissutit pillugit naapertorlugu. Piffissap taassuma kingorna aningaasaateqarfiup aningaasaatai aamma aningaasaateqarfiup aningaasaataanit pissarsiat taamaallaat Namminersorlutik Oqartussanut tunniunneqarsinnaapput, ukiumi aningaasanut inatsiseqarfiusumi Namminersorlutik Oqartussat aatsitassanit isertitaat naalagaaffimmit Namminersorlutik</p>

<p>anigaasat tunniussinnaasat, Naalagaaffimmit tapiissutaajuunnaartunit, amerlanerusunik annertussusilerneqarsinnaalissapput.</p> <p><i>Imm. 4.</i> Inatsisartut aningaasanut inatsisaanni imaluunniit ilassutitut aningaasaliissutini aalajangerpata aningaasaateqarfiup aningaasaataasa ilaat Namminersornerusunut tunniunneqassasut, aningaasaateqarfiup aningaasat landskarsimut akiliutigissavai, imm. 1 aamma 2-mi piumasaqaataasut eqquutsinneqarsimappata. Inatsisartut aningaasanut inatsisaasa imaluunniit ilassutitut aningaasaliissutaasa akuerineqarnerisa kingorna kingusinnerpaamik qaammatit marluk qaangiunnerini akiliineq pissaaq, taamaattorli ukiumi aningaasarsiorfiusumi pineqartumi siusinnerpaamik 1. januar.</p> <p>Aningaasaqarnermut niuernernullu tunngasut, ilaallutik aningaasaateqarfiup aningaasaataanik aqutsinermut aningaasalersuinernullu tunngassutillit ajornartitsinngippata, Naalakkersuisut aningaasaateqarfiup siulersuisuisa inassuteqarnerisigut aalajangersinnaapput, nuussinissamut killigititaq kingusinnerusumut kinguartinneqarsinnaasoq, taamaattorli inatsisartut aningaasanut inatsisaata imaluunniit ilassutitut aningaasaliissutaasa akuerineqarneranit qaammatinik arfinilinnik kingusinnerusinnaanani.</p>	<p>Oqartussanut ataatsimoortumik tapiissutit ikilisinneqarnerannit kinguneqarpat, taamaattorli tak. imm. 3.</p> <p><i>Imm. 3.</i> Ukiumi aningaasanut inatsiseqarfiusumi Namminersorlutik Oqartussat aatsitassanit isertitaat siullermeertumik ima annertutigilerpata, tamatuma kinguneralugu Namminersorlutik Oqartussanut naalagaaffiup ataatsimoortumik tapiissutaat atorunnaarlutik, taava aningaasaateqarfiup aningaasaataanit aamma aningaasaateqarfiup aningaasaataanit pissarsianit Namminersorlutik Oqartussanut akilerneqartartut annertunerusinnaapput, Namminersorlutik Oqartussat ukiumi aningaasanut inatsiseqarfiusumi aamma ukiumi tulliuuttuni isertitaasa ikilisinneqarneranni Namminersorlutik Oqartussanut naalagaaffiup ataatsimoortumik tapiissutaasa ikilisinneqarnerisigut.</p> <p><i>Imm. 4.</i> Inatsisartut aningaasanut inatsisaanni imaluunniit ilassutitut aningaasaliissutini aalajangersarneqarpat aningaasaateqarfiup aningaasaataasa ilaat imaluunniit aningaasaateqarfiup aningaasaataanit pissarsiaasa ilaat Namminersorlutik Oqartussanut tunniunneqassasut, aningaasaateqarfiup aningaasat nunatta karsianut akiliutigissavai, imm. 1 aamma 2-mi piumasaqaataasut eqquutsinneqarsimappata. Inatsisartut aningaasanut inatsisaata imaluunniit ilassutitut aningaasaliissutit akuerineqarnerisa kingorna kingusinnerpaamik qaammatit marluk qaangiunnerini akiliineq pissaaq, taamaattorli ukiumi aningaasanut</p>
---	--

	<p>inatsiseqarfiusumi pineqartumi siusinnerpaamik 1. januaari.</p> <p>Aningaasaqarnermut niuernernullu tunngasut, tamatumunnga ilanngullugit aningaasaateqarfiup aningaasaataanik aamma aningaasaateqarfiup pissarsiaanik aqutsinerup aamma aningaasaliisarnermut pissutsit tamanna ajornartinnigipassuk, taava Naalackersuisut aningaasaateqarfiup siulersuisuisa inassuteqaataat naapertorlugu aalajangersarsinnaavaat, nuussinerup kingusinnerusukkut pisinnaanera, taamaattorli Inatsisartut Aningaasanut Inatsisaata imaluunniit ilassutitut aningaasaliissutit akuersissutigineqareernerisa kingornatigut qaammatinit 6-init kingusinnerunngitsumik.”</p>
<p>§ 12. <i>Imm. 2.</i> Siulersuisunut ilaasortat Naalackersuisunut imaluunniit Inatsisartunut ilaasortaasussaannngillat.</p>	<p>12. § 12, imm. 2, ima oqaasertalerneqassaaq: ”Imm. 2. Siulersuisunut ilaasortat Naalackersuisunut imaluunniit Inatsisartunut ilaasortaassannngillat.”</p>
<p>§ 24. <i>Imm. 4.</i> Siulersuisut nakkutigissavaat naatsorsuuserinerup aningaasatigullu pisuus-sutinik aqutsineq aningaasaateqarfiup atuuf-fia naapertorlugu naammaginartumik nakkutigineqassasut. Taamattaq siulersuisut akisussaaffigissavaat aningaasaateqarfiup</p>	<p>13. § 24, imm. 4, ima oqaasertalerneqassaaq: § 24. ”<i>Stk. 4.</i> Imm. 4. Siulersuisut nakkutigissavaat naatsorsuuserinerup aningaasatigullu pisuus-sutinik aqutsineq aningaasaateqarfiup atuuffia naapertorlugu naammaginartumik nakkutigineqassasut. Taamattaq siulersuisut akisussaaffigissavaat aningaasaateqarfiup aningaasaataanik atuineq akiliisarnertu inatsisartut inatsisaata matuma</p>

<p>anigaasaataanik atuineq akiliisarnerlu inatsisartut inatsisaata matuma malittarisassiuussineri malillugit pisassasut, takukkit §§ 6 aamma 7, tamatumunngalu atatillugu pisortaq malittarisassanik innersuussutinillu pisariaqartitaanik tamanik tunissallugu.</p>	<p>malittarisassiuussineri malillugit pisassasut, takukkit §§ 6 aamma 7, tamatumunngalu atatillugu pisortaq malittarisassanik innersuussutinillu pisariaqartitaanik tamanik tunissallugu.”</p>
<p>§ 30. Anigaasaateqarfiup anigaasaliissutai sammisanut Kalaallit Nunaata avataaniittunut inissinneqassapput.</p> <p>Imm. 2. Anigaasaateqarfiup anigaasaatai agguariaaseq imaattoq malillugu inissinneqassapput:</p> <p>1) Najoqqutat ernialersorneqarsinnaasut: 75 – 85 %</p> <p>2) Najoqqutat namminerisamik anigaasaatigisanut tunngasut: 15 – 25 %</p> <p>Imm. 3.</p> <p>Anigaasaateqarfiup anigaasaliissutai sammisanut inooqatigiinnikkut akisussaaffeqanngitsunut inissinneqassanngillat.</p>	<p>14. § 30, imm. 2, ima oqaasertalerneqassaaq:</p> <p>” Imm. 2. Anigaasaateqarfiup anigaasaatai anigaasaateqarfiullu anigaasaataanit pissarsiat agguariaaseq imaattoq malillugu inissinneqassapput:</p> <p>1) Aktiat: 60-70%.</p> <p>2) Obligationit: 25-35%.</p> <p>3) Illut aalajangersimasut: 5-8%.”</p>
<p><i>Atuutilerfia</i></p>	<p>15. Kapitali 15-imi kapitalip qulequtaa ima oqaasertalerneqassaaq:</p> <p>“<i>Atuutilerfia aamma anigaasaateqarfiup siulersuisui kiisalu anigaasaateqarfiup pisuussutaasa aamma ukiumoortumik pissarsiaasa killeqarnerisa nalaani</i>”</p>

	<i>allaffissorneq</i>
	<p>16. § 50-ip kingornatigut ilanngunneqassaaq:</p> <p>” § 51. Kapitali 7-imi aalajangersakkat aatsaat atuutilissapput 31. december kingorna ukiumi tassani, piumasaqaatit tulliuttut ataasiarlutik eqquutsinneqareerpata:</p> <p>1) Aningaasaateqarfiup aningaasaataasa 1 milliard koruuninit amerlanerulerpata.</p> <p>2) Aningaasaateqarfiup aningaasaataanit pissarsiat ukiumi tassani 50 millioner koruuninit amerlaneruppata.</p> <p>§ 52. Kapitali 7-imi aalajangersakkat atuutilernissaasa tungaanut, aningaasaateqarfiup aqunneqarnera, ingerlanneqarnera allaffissornertaalu Naalakkersuisunit ingerlanneqassaaq.</p> <p><i>Imm. 2.</i> Inatsisartut inatsisaanni matumani malittarisassat naapertorlugit aningaasaateqarfimmik siunertarisat naapertorlugit aningaasaateqarfiup aqunnera, ingerlannera allaffissornertaalu Naalakkersuisunit ingerlanneqassaaq.</p> <p><i>Imm. 3.</i> Aningaasaateqarfiup ingerlanneqarneranut ineriartorneranullu sunniuteqarsinnaasutut paasissutissat nalilerneqartut pillugit nalunaarutinik qaammatit pingasukkaarlugit Naalakkersuisut saqqummiussisassapput.”</p>
	<p>§ 2</p> <p>Inatsisartut Inatsisaat 1. januaari 2018</p>

3. Pisortanut aningaasaqarnikkut aamma allaffissornikkut kingunerisassai

Naatsorsuutigineqanngilaq siunissaq qaninnerusooq eqqarsaatigalugu siunnersuutip oqartussaasunut aningaasatigut imaluunniit allaffissornikkut malunnaateqartumik kinguneqarnissaa.

Siunissaq ungasisooq eqqarsaatigalugu Aatsitassarsiormi Aningaasaateqarfiup aningaasaqarnikkut tunngavia pitsanngussasooq naatsorsuutigineqarpoq. Ilaatigut aningaasaateqarfimmit namminersorlutik oqartussanut aningaasanik nuussisinaanermut periarfissat annikillisinneratigut, ilaatigullu aningaasaliinissamut periusissamik atorluarneqarsinnaanerusumik sanasinnaalernissamik pissuteqarpoq. Tamatuma nalinga missingersorneqarsinnaanngilaq.

Tamatuma saniatigut aallartisarnermi allaffissornikkut aningaasartuutissaraluit sipaakkat aningaasaateqarfiup aningaasaqarnerata tunngavianik pitsanngorsaassapput.

Naatsorsuutigineqarpoq, siulersuisunut akissarsititsinissaraluinit, pisortap akissarsiassaraluanit il.il. sipaarutit ukiumut 1 mio. kr.-it missaanniissasut.

Naatsorsuutigineqarpoq inatsimmi § 7 naapertorlugu aallartinneqarnissaa tikillugu Aatsitassarsiormik Aningaasaateqarfimmik allaffissornermut Namminersorlutik Oqartussanit aningaasartuutigineqartussaq aningaasaliissutit pioreersut iluanni pisinnaasooq.

4. Inuussutissarsiutinik ingerlatsisunut aningaasaqarnikkut aamma allaffissornikkut kingunerisassai

Naatsorsuutigineqanngilaq siunnersuutip oqartussaasunut aningaasatigut imaluunniit allaffissornikkut malunnaateqartumik kinguneqarnissaa.

5. Avatangiisinut, pinngortitamut innuttaasullu peqqissusiannut kingunerisassai

Siunnersuut avatangiisinut, pinngortitamut imaluunniit innuttaasut peqqissusiannut kinguneqassanngilaq.

6. Innuttaasunut kingunerisassai

Naatsorsuutigineqanngilaq siunnersuutip innuttaasunut kinguneqarnissaa.

Siunnersuuteqarnermi ilaatigut siunertarineqarpoq ingammik siunissami kinguaariit soqutigisaasa illersorniarneri, tassa aningaasaateqarfiup aningaasaataasa taamaallaat immikkut ittumik pisoqarneratigut tunniunneqarsinnaanerisa qulakkeerneqarneratigut, kiisalu tamatuma kingunerisaanik ataatsimut isiginnilluni aningaasaateqarfiup pisuussutaasa nungukkiartuaarneqarnatik ileqqaarneqarlutik. Ataatsimut innersuussivigineqarput Inatsisartut

inatsisaani § 2, imm. 2, nr. 3-5 aamma Inatsisartut inatsisaanni §§ 6-imit 8-mut siunnersuummi allanngortinneqartut kiisalu taakkununga oqaaseqaatit.

Ataatsimut isigalugu siunnersuut qulakkeerinninnermut tapertaavoq, tassa aningaasaateqarfiup pisuussutaasa, taakkununga ilanngullugit aningaasaateqarfiup aningaasaatai aamma aningaasaateqarfiup aningaasaataanit pissarsiat inissinneqarnissaannut, nakkutigineqarnissaannut, tunniunneqarnissaannut aamma isumannaatsumik tulluarnepaamillu atorneqarnissaannut, taamaaliornikkut inuiaqatigiit kalaallit piffissami ungasinnerusumi inuiaqatigiit aningaasaqarniarneranni sapinngisamik annertunerpaamik iluanaaruteqarniassammata, kiisalu tamatuma sunniutai iluaqutaanerpaat angussallugit.

7. Sunniutaasussat allat malunnaateqarluartut

Tamanna siunnersuutip allanut malunnaateqartumik kinguneqarnissaa naatsorsuutigineqanngilaq.

8. Oqartussaasunik aamma kattuffinnik il.il. tusarniaaneq

Siunnersuut tusarniaassutigineqarpoq piffissami 18. maajimit 23. juuni tikillugu 2017 oqartussaasuni aamma kattuffinni ilaalu ilanngullugit makkunani: SIK, Kalaallit Nunaanni Sulisitsisut, KANUKOKA, Kommuneqarfik Sermersooq, NUSUKA, Deloitte, Grønlands Revisionskontor, BK Revision, EY Grønland, BDO, Grønlandske Advokater, Inuussutissarsiornermut, Suliffeqarnermut, Niuernermullu Naalakkersuisoqarfik, Aatsitassanut Ikummatissanullu Naalakkersuisoqarfik, GrønlandsBANKEN, BankNordik, Naalakkersuisut Siulittaasuata Naalakkersuisoqarfia aamma Namminiilivinnermut, Nunanut Allanut Nunalerinermullu Naalakkersuisoqarfik

Siunnersuut taamatuttaaq Namminersorlutik Oqartussat tusarniaanernut quppersagaani tamanut saqqummiunneqarpoq.

Tusarniaanermi akissuteqaatit taamaallaat KANUKOKA-mit tiguneqarput

KANUKOKA siunnersuummut oqaaseqaateqanngilaq.

Aalajangersakkanut ataasiakkanut oqaaseqaatigineqartut

§ 1-imut

Nr. 1-imut (Inatsisartut inatsisaanni tamarmiusumi)

Aalajangersakkami ersersinneqarpoq inatsisip danskisuuani Grønlands Landsting-itut taaneqartarsimasup Inatsisartut-nik taaneqartalersimanera pillugu allannguut.

Aalajangersakkami allanngortinneqarpoq inatsisip danskisuuani landstingsfinanslov Inatsisartutfinanslov-imut allanngortinneqartoq il.il., taamaasilluni taaguutit taamaattut ”Inatsisartut” –nik taarserneqarlutik.
taamaalillutik

Nr. 2-mut (§ 2, imm. 2, nr. 3-p)

Aalajangersakkami killilerneqarpoq aningaasaateqarfiup pisuussutaasa tamarmiusut ilaat sorliit, Namminersorlutik Oqartussat aatsitassarsiornermut aningaasaliissuteqarnerannut, aatsitassarsiornermi aningaasartuutaanut aamma suliassat utertinneqartut isumagineqarnerannut aningaasartuutitut, matusissutissatut Inatsisartut inatsisaat naapertorlugu aamma Inatsisartut aningaasanut Inatsisaanni imaluunniit ilassutitut aningaasaliissutini Inatsisartut akuerisaat naapertorlugit atorneqarsinnaanerit. Taamaalilluni aalajangersakkami killiliisoqarpoq aningaasaateqarfiup pisuussutaasa tamarmiusut ilaat sorliit aningaasaliissutitut aamma aningaasartuutitut taaneqartunut matusissutissatut atorneqarsinnaanerit.

Siunnersuummi immikkoortinneqarput aningaasaateqarfiup aningaasaataanik tunniussisarnerit aamma aningaasaateqarfiup aningaasaataanit pissarsianit tunniussisarnerit. Siunnersuummi nr. 5 naapertorlugu pissarsiat imatut paasineqassapput aningaasat pisissutaasinnaanerisa nalikillinerisa kingornatigut pissarsiat nalingi (pissarsiaviit), tassa aningaasaateqarfiup aningaasaataanit ukiumi aningaasanut inatsiseqarfiusumi ataatsimi arlalinniluunniit pissarsiat, taakkunangga, ukiumi aningaasanut inatsiseqarfiusumi pineqartumi imaluunniit ukiuni aningaasanut inatsiseqarfiusuni pineqartuni aningaasaateqarfimmi allaffissornermut aamma ingerlatsinerit aningaasartuutaasut, ilanngaatigalugit. Ataatsimut innersuussutigineqarput aalajangersagaq taaneqartoq aamma tassunga oqaaseqaatit.

Siunnersuummi aalajangersakkap malitsigisaanik taamaallaat aningaasaateqarfiup aningaasaataanit pissarsiat tunniunneqarsinnaapput Namminersorlutik Oqartussat aatsitassarsiornermut aningaasalersuinerannut aamma aatsitassarsiornermik sammisaqarnermi aningaasartuutaannut kiisalu suliassat utertinneqartut isumagineqarnerannut aningaasartuutaannut matussusiinissanut atorneqartussatut Inatsisartut inatsisaanni malittarisassat malillugit aammalu Inatsisartut Aningaasanut Inatsisaanni imaluunniit

ilassutitut aningaasaliissutini Inatsisartut akuerisaat naapertorlugit. Taamaalilluni aningaasaateqarfiup aningaasaataanit aningaasaliissuteqarnernut aamma aningaasartuutitut taaneqartunut tunniussisinnaaneq periarfissaanngilaq.

Siunnersuut allannguutininik kinguneqassanngilaq aningaasaliinerit aamma aningaasartuutitut suut matussuserneqaqqusaanersut eqqarsaatigalugit § 2, imm. 2, nr. 3-mi, aalajangersakkat naapertorlugit.

Siunnersuutip aaqqissuunneqarnera Hartwickip maleruaqqusaatut taaneqartartumut naapertuuppoq. Siunnersuutip aaqqissuussaanaera ilaatigut norgemiut uuliamik aningaasaateqarfiata (Statens Pensjonsfond utland) aaqqissuussaananeranut assinguvoq. Ataatsimoortumik innersuussutigineqarput immikkoortoq 2.2.1-imi aamma 2.2.2-mi nalinginnaasumik oqaaseqaatit.

Nr. 3-mut (§ 2, imm. 2, nr. 4)

Aalajangersagaq allanngortinneqarpoq siunnersuutip, aningaasaateqarfiup aningaasaataanik tunniussisarnermik aamma aningaasaateqarfiup aningaasaataanit pissarsianik tunniussisarnermik, immikkoortitsinerup kingunerisaanik.

Aalajangersakkami erseqqissarneqarpoq aningaasaateqarfiup aningaasaatai aamma aningaasaateqarfiup aningaasaataanit pissarsiat, siunnersuummi § 1, nr. 2, (§ 2, imm. 2, nr. 3) kingunerisai eqqaassanngikkaanni, taamaallaat Namminersorlutik Oqartussanut tunniunneqarsinnaasut Inatsisartut inatsisaanni maleruaqqusat malillugit aamma Inatsisartut aningaasanut Inatsisaannik imaluunniit ilassutitut aningaasaliissutinik akuersissuteqartoqarnera tunngavigalugit.

Ataatsimoortumik innersuussuffigineqarput siunnersuummi § 1, nr. 2, aamma immikkoortut 2.2.1 kiisalu 2.2.2 nalinginnaasumik oqaaseqaatiniittut.

Nr. 4-mut (§ 2, imm. 2, nr. 5)

Aalajangersagaq allanngortinneqarpoq siunnersuutip, aningaasaateqarfiup aningaasaataanik tunniussisarnermik aamma aningaasaateqarfiup aningaasaataanit pissarsianik tunniussisarnermik, immikkoortitsinerup kingunerisaanik. Ataatsimoortumik innersuussutigineqarput siunnersuummi § 1, nr. 2-mut oqaaseqaatit.

Nr. 5-imut (§ 3, imm. 7)

Aalajangersagaq nutaajuvoq Inatsisartut inatsisaannut atuuttumut sanilliussilluni.

Aalajangersakkami taaneqarpoq siunnersuut tunngavigalugu aningaasaateqarfiup aningaasaataanit pissarsiat qanoq paasineqarnissaat.

Siunnersuummi § 1, nr. 5 naapertorlugu pissarsiat imatut paasineqassapput aningaasat pisissutaasinnaanerisa nalikillinerisa kingornatigut pissarsiat nalingi (pissarsiaviit), tassa aningaasaateqarfiup aningaasaataanit ukiumi aningaasanut inatsiseqarfiusumi ataatsimi imaluunniit arlalinni pissarsiat taakkunannga, ukiumi aningaasanut inatsiseqarfiusumi pineqartumi imaluunniit ukiumi aningaasanut inatsiseqarfiusuni pineqartuni aningaasaateqarfimmi allaffissornermut aamma ingerlatsinermut aningaasartuutaasut ilanngaatigalugit.

Nr. 6-imut (§ 4, oqaaseqatigiit siulliit)

Aalajangersakkami taamaallaat pineqarpoq oqaatsinik iluarsineq.

Nr. 7-imut (kapitali 4-mi kapitalip qulequtaa)

Inatsisartut inatsisaanni kapitalip qulequtaa kapitali 4 allanngortinneqarpoq siunnersuutip aningaasaateqarfiup aningaasaataanik tunniussisarnermik aamma aningaasaateqarfiup aningaasaataanit pissarsianik tunniussisarnermik immikkoortitsinerup kingunerisaanik. Ataatsimoortumik innersuussutigineqarput siunnersuummi § 1, nr. 2, (§ 2, imm. 2, nr. 3) aamma tassunga oqaaseqaatit.

Nr. 8-mut (§ 6, imm. 2)

Aalajangersakkami erseqqissarneqarpoq aamma itisilerneqarpoq Inatsisartut inatsisaanni § 6, imm. 2-mi aalajangersagaq atuutereersoq.

Siunnersuummi aalajangersakkap § 1, nr. 9-miittup ersersippaa aningaasaateqarfimmit isumagineqassasoq Namminersorlutik Oqartussat aningaasaliissutaat aamma aningaasartuutaat inatsimmi § 6, imm. 1-imi taaneqartut, aningaasaateqarfiup aningaasaataanit pissarsianit matussuserneqartassasut Inatsisartut Aningaasanut Inatsisaannik imaluunniit ilassutitut aningaasaliissutinik akuersissuteqartoqarnera tunngavigalugit. Ataatsimoortumik innersuussutigineqarput siunnersuummi § 1, normu 2 aamma tassunga oqaaseqaatit.

Namminersorlutik Oqartussat aningaasaliissutaat aamma aningaasartuutaat inatsimmi § 6, imm. 1-imi taaneqartut aningaasaateqarfiup aningaasaataanit pissarsianit taamaallaat matussuserneqarsinnaapput, tamanna ajornangippat ukiumi aningaasanut inatsiseqarfiusumi pineqartumi § 1, nr. 10 (§6, imm. 3 aamma 4) aamma Inatsisartut inatsisaanni allat pineqartut naapertorlugit. Taamaalilluni aningaasaateqarfik pisussaatitaanngilaq aningaasaateqarfiup aningaasaataanit pissarsiat, aningaasaliissutitut aamma aningaasartuutitut taaneqartunut, matussissutissatut tunniutissallugit, tassa aningaasaateqarfiup aningaasaataanit pissarsiat inatsimmi § 6, imm. 3 aamma 4 naapertorlugit matussutaasinnaangippata.

Namminersorlutik Oqartussat aningaasaliissutaat aamma aningaasartuutaat inatsimmi § 6, imm. 1-imi taaneqartut aningaasaateqarfiup aningaasaataanit tunniussinikkut matussuserneqarsinnaanngillat. Ataatsimoortumik siunnersuummi § 1, normu 2 aamma tassunga oqaaseqaatit innersuussutigineqarput.

Nr. 9-mut (§ 6, imm. 3)

Aalajangersagaq nutaajuvoq Inatsisartut inatsisaannut atuuttumut naleqqiussilluni.

Aalajangersagaq siunnersuummi § 1, nr. 2-mut aamma 3-mut immikkut attuumassuteqarnera isiginiarneqassaaq. Ataatsimoortumik innersuussutigineqarput aalajangersakkat taaneqartut aammat taakkununnga oqaaseqaatit.

Siunnersuummi § 1, nr. 9-mi (§ 6, imm. 3-imi oqaaseqatigiit siulliit) aalajangersakkami pineqarpoq aningaasaateqarfik ukiumi aningaasanut inatsiseqarfiusumi taamaallaat Namminersorlutik Oqartussanut pissarsianik, siunnersuummi § 1, nr. 8 (§ 6, imm. 2) naapertorlugu Namminersorlutik Oqartussat aningaasaliissutaannut aamma aningaasartuutaannut matusissutissanik tunniussisinnaasoq inatsimmi § 6, imm. 1 naapertorlugu ukiumi aningaasanut inatsiseqarfiusumi. Taamaalluni siunnersuummi § 1, nr. 9 (§ 6, imm. 3-imi oqaaseqatigiinni siullerni) aalajangersakkap kinguneraa aningaasaateqarfik ukiumi aningaasanut inatsiseqarfiusumi Namminersorlutik Oqartussanut siunnersuummi § 1, nr. 8 (§ 6, imm. 2) naapertorlugu pissarsiat taamaallaat tunniunneqarsinnaapput Namminersorlutik Oqartussat aningaasaliissutaannut ukiumi aningaasanut inatsiseqarfiusutut pineqartumi aamma aningaasartuutaannut ukiumi aningaasanut inatsiseqarfiusutut pineqartumi atorsimasaannut matusissutissatut. Tamanna paasineqassaaq assersuutigalugu aningaasaateqarfik ukiumi aningaasanut inatsiseqarfiusumi pissarsianik aningaasaliissutinut matusissutissatut tunniussisinnaanngilaq, Namminersorlutik Oqartussat ukiup aningaasanut inatsiseqarfiusup siuliani aningaasaliissutigisimasaannut imaluunniit aningaasartuutinut, Namminersorlutik Oqartussat ukiup aningaasanut inatsiseqarfiusup siuliani atorsimasaannut.

Siunnersuummi § 1, nr. 9-mi (§ 6, imm. 3-imi oqaaseqatigiit aappaat) aalajangersakkap imaraa aningaasat katillugit qummut killissaasa annertussusiat, tassa aningaasaateqarfiup ukiumi aningaasanut inatsiseqarfiusumi pissarsianit Namminersorlutik Oqartussanut tunniussinnaasaanut tunngasut, Namminersorlutik Oqartussat aningaasaliissutaannut aamma aningaasartuutaannut matusissutissatut inatsimmi § 6, imm. 1-imi taaneqartunut. Siunnersuummi § 1, nr. 9-mi (§ 6, imm. 3, oqaaseqatigiit aappaat) pineqarpoq aningaasaateqarfik ukiumi aningaasanut inatsiseqarfiusumi Namminersorlutik Oqartussanut siunnersuummi § 1, nr. 8 (§ 6, imm. 2) naapertorlugu katillugit aningaasat tunniussinnaasai tassaasinnaasut ukiuni aningaasanut inatsiseqarfiusuni kingullerni 5-imi agguaqatigiissitsilluni ukiumut pissarsianit annertunerunngitsut, tassa ukioq aningaasanut inatsiseqarfiusup pineqartoq sioqqullugu, taamaattorli tak. § 1, nr. 9-mut (§ 6, imm. 4) siunnersuut.

Soorlu assersuutigalugu apeqqutaanngilaq aningaasaateqarfiup pissarsianit ukiumi aningaasanut inatsiseqarfiusumi siunnersuummi § 1, nr. 8 (§ 6, imm. 2) naapertorlugu tunniussai pissarsianit, ukiumi aningaasanut inatsiseqarfiusumi pineqartumi aningaasaateqarfiup katersarisimasaanit amerlanerugaluarpata, imaaginnarpat ukiumi aningaasanut inatsiseqarfiusumi tassani katillugit aningaasat tunniunneqartut ukiuni aningaasanut inatsiseqarfiusuni kingullerni 5-ini agguaqatigiissitsilluni pissarsianit amerlaneruppata, ukiup aningaasanut inatsiseqarfiusup pineqartup siulianit. Aningaasaliissutit aamma aningaasartuutit aningaasaateqarfiup ukiumi aningaasanut inatsiseqarfiusumik pissarsiaminik tunniussineratigut matussuserneqartut oqaatigineqareersutut tassaassapput ukiumi aningaasanut inatsiseqarfiusumi atorneqartut, tassa pissarsiat tunniunneqarfianni, tak. § 1, nr. 9-mut (§ 6, imm. 3, oqaaseqatigiit siulliit) siunnersuut.

Aningaasaateqarfik arlaatigut periarfissaqarpoq pissarsianik suli Namminersorlutik Oqartussanut tunniusseqqinnissaminut, Namminersorlutik Oqartussat aningaasaliissuteqarnerannut aamma aningasartuutaannut matusissutissanik inatsimmi § 6, imm. 1-imi taaneqartunut, tassa Naalakkersuisut tamanna pillugu aalajangiissappata siunnersuummi nr. 9 (§ 6, imm. 4) naapertorlugu. Ataatsimoortumik aalajangersagaq taaneqartoq aamma tassunga oqaaseqaatit innersuussutigineqarput.

Nr. 9-mut (§ 6, imm. 4)

Aalajangersagaq nutaajuvoq Inatsisartut inatsisaannut atuuttumut naleqqiussilluni. Aalajangersagaq siunnersuummi § 1, nr. 2, 8 aamma 9-mut immikkut attuumassuteqarnera isiginiarneqassaaq. Ataatsimoortumik innersuussutigineqarput aalajangersakkat taaneqartut aamma taakkununga oqaaseqaatit.

Aalajangersakkami ilaavoq Naalakkersuisunut piginnaatitsissut aalajangersaanissamut, tassa aningaasaateqarfiup ukiumi aningaasanut inatsiseqarfiusumi Namminersorlutik Oqartussanut pissarsianik tunniussisinnaaneranut, siunnersuummi nr. 8 aamma 9 (§ 6, imm. 2 aamma 3) naapertorlugit, imatut annertussuseqartunik ukiumi aningaasanut inatsiseqarfiusumi aningaasat katillugit tunniunneqartut, katillugit pissarsianit annertuneruppata, tassa ukiuni kingullerni 5-ini isertitarineqarsimasunit aamma Namminersorlutik Oqartussanut tunniunneqarsimangitsunit ukioq aningaasanut inatsiseqarfiusoq pineqartoq sioqqullugu.

Siunnersuummi nr. 9 (§ 6, imm. 3, oqaaseqatigiit aappanni) aallaaviuvoq aningaasaateqarfiup Namminersorlutik Oqartussanut taamaallaat pissarsianik tunniussisinnaanera siunnersuummi § 1, nr. 8 (§ 6, imm. 2) naapertorlugu, imaattoqarpat aningaasat tunniunneqartut katillugit amerlassusiisa ukiumi aningaasanut inatsiseqarfiusumi, katillugit pissarsianit annertunerussanngillat, tassa ukiuni kingullerni 5-ini isertitarineqarsimasunit ukioq aningaasanut inatsiseqarfiusoq pineqartoq sioqqullugu ukiumilu aningaasanut inatsiseqarfiup pineqartup siuliani ukiuni aningaasanut inatsiseqarfiusuni tallimani namminersorlutik

oqartussanut akilerneqarsimanatik. Ataatsimoortumik innersuussutigineqarput siunnersuummi § 1, nr. 9 (§ 6, imm. 3) aamma tassunga oqaaseqaatit.

Siunnersuummi § 1, nr. 9 (§ 6, imm. 4) naapertorlugu Naalakkersuisut aalajangersaanissaminut periarfissaqarput pisut piviusut tunngavigalugit Namminersorlutik Oqartussanut aningaasaateqarfik pissarsianik, siunnersuummi § 1, nr. 8 aamma 9 (§ 6, imm. 2 aamma 3-mi) malinneqartussanit, sulii aningaasanik tunniusseqqissinnaasoq. Taamaattorli tamatigit killissarititaasoq atuuppoq, tassa pissarsianik taamaallaat tunniussisinnaavoq ukiumi aningaasanut inatsiseqarfiusumi aningaasat tunniunneqartut ukiuni aningaasanut inatsiseqarfiusuni kingullerni 5-ini agguaqatigiissitsilluni ukiumut, tassa ukioq aningaasanut inatsiseqarfiusooq pineqartoq sioqqullugu.

Taamaalilluni siunnersuutip § 1, nr. 9-miittup (§ 6, imm. 4) imaraa killissarititaasoq annerpaaq saneqqunneqarsinnaanngitsoq, tassa aningaasaateqarfik pissarsiaminit qanoq amerlatigisunik Namminersorlutik Oqartussat aningaasaliissuteqarnerannut aamma aningaasartuutaannut siunnersuummi § 1, nr. 8 aamma 9 (§ 6, imm. 2 aamma 3) naapertorlugit matusissutissatut tunniussaqaarsinnaaneranut tunngatillugu. Aalajangersakkami immikkut siunertaavoq aningaasaateqarfiup pisuussutaasa nungukkiartunnginnissaasa qulakkeerneqarnissaat.

Pissarsiat katillugit ukiuni aningaasanut inatsiseqarfiusuni kingullerni 5-imi ukioq aningaasanut inatsiseqarfiusooq sioqqullugu aningaasaateqarfiup pissarsiarisimasai, soorlu assersuutigalugu 5.000.000 koruuniuppata, aamma aningaasaateqarfik ukiuni aningaasanut inatsiseqarfiusuni kingullerni 5-ini ukioq aningaasanut inatsiseqarfiusooq pineqartoq sioqqullugu, soorlu assersuutigalugu katillugit 3.000.000 koruuninik pissarsiaminik siunnersuummi § 1, nr. 8 aamma 9 (§ 6, imm. 2 aamma 3) naapertorlugit tunniussisimaguni, taava aningaasaateqarfik ukiumi aningaasanut inatsiseqarfiusumi pineqartumi 2.000.000 koruunit angullugit pissarsiaminit tunniussisinnaavoq, siunnersuummi § 1, nr. 9 (§ 6, imm. 4) naapertorlugu. Tamannali taamaallaat atuutissaaq aningaasat 2.000.000 koruuninik amerlassusillit ukiuni aningaasanut inatsiseqarfiusuni kingullerni 5-imi agguaqatigiissitsilluni amerlaneruppata ukiup aningaasanut inatsiseqarfiusup pineqartup siuliani, soorlu siunnersuummi § 1, nr. 9 (§ 6, imm. 3-mi) taaneqartutut.

Aningaasaateqarfiup siunnersuummi § 1, nr. 9 (§ 6, imm. 4) naapertorlugu pissarsianik tunniussinissaminut periarfissaani piumasaqaataavoq Naalakkersuisut tamanna pillugu aalajangersaanissaat. Naalakkersuisut taamatut aalajangersaassapput pissutsit attuumassutillit pisuni ataasiakkaani piviusut tunngavigalugit nalilersuereerseq tunngavigalugu.

Aalajangersakkami taamaallaat pineqarpoq aningaasaateqarfiup aningaasaatiminit pissarsiaminit tunniussinera, tassanilu pineqanngilaq aningaasaateqarfiup aningaasaatiminik

tunniussinera. Ataatsimoortumik innersuussutigineqarput siunnersuummi § 1, nr. 2 (§ 2, imm. 2-mut aamma 3-mut) oqaaseqaatigineqartut.

Nr. 10-mut (§ 6, imm. 5)

Aalajangersagaq allanngortinneqarpoq siunnersuutip aningaasaateqarfiup aningaasaataanik tunniussisarnermik aamma aningaasaateqarfiup aningaasaataanit pissarsianik tunniussisarnermik immikkoortitsinerup kingunerisaanik.

Siunnersuutip § 1, nr. 2-ata (§ 2, imm. 2, nr. 3) kingunerisaanik taamaallaat aningaasaateqarfiup aningaasaataanit pissarsiat Namminersorlutik Oqartussat aatsitassarsiornermut aningaasaliissuteqarnerannut, aatsitassarsiornermi aningaasartuutaanut aamma suliassat utertinneqartut isumagineqarnerannut aningaasartuutininut, matusissutissatut Inatsisartut inatsisaat naapertorlugu aamma Inatsisartut Aningaasanut Inatsisaanni imaluunniit ilassutitut aningaasaliissutini Inatsisartut akuerisaat naapertorlugit atorneqarsinnaanerit. Taamaalilluni aningaasaateqarfiup aningaasaataanit aningaasaliissutinut aamma aningaasartuutininut taaneqartunut matusissutissatut tunniunneqarsinnaanngillat. Ataatsimoortumik innersuussutigineqarput aalajangersagaq taaneqartoq tassungalu oqaaseqaatigineqartut.

Nr. 11-mut (§ 7)

Aalajangersagaq allanngortinneqarpoq siunnersuutip, aningaasaateqarfiup aningaasaataanik tunniussisarnermik aamma aningaasaateqarfiup aningaasaataanit pissarsianik tunniussisarnermik immikkoortitsinerup kingunerisaanik. Ataatsimoortumik innersuussutigineqarput siunnersuummi § 1, nr. 2 (§ 2, imm. 2, nr. 3) aamma tassunga oqaaseqaatigineqartut.

Nr. 12-imut (§ 12, imm. 2)

Aalajangersakkami inatsisip danskisuuani Landstyret Naalakkersuisut-nik kiisalu Landsting Inatsisartut-nik taaneqartalersimanerisa kingunerisaanik allannguutaapput.

Nr. 13-imut (§ 24, imm. 4)

Aningaasaateqarfimmi aningaasat kiisalu aningaasaateqarfiup pissarsiaasa akornanni immikkoortitsinerulernermik siunnersuummut pissutaavoq.

Siunnersuummittaag erseqqissarneqarpoq, aningaasaateqarfiup pissarsiaanik atuinermit akiliinermullu siulersuisut akisussaasuusut.

Nr. 14-imut (§ 30, imm. 2)

Aalajangersakkami aalajangersarneqarput aningaasaateqarfiup aningaasaataanit sumut inissiisoqarnissanut maleruaqqusat nutaat.

Aalajangersagaq naapertorlugu aningaasaateqarfiup aningaasaatai kiisalu aningaasaateqarfiup aningaasaataanit pissarsiat nalilinnut maannakkornit nalorninartortaqrnerusunut aningaasaliissutigineqartassapput. Aningaasaliissutit maannakkutut nalilinnut Kalaallit Nunaata avataaniittunut aningaasaliissutigineqartassapput, tak. Inatsisartut inatsisaat § 30, imm. 1.

Aalajangersagaq naapertorlugu aningaasaateqarfiup aningaasaatai aningasaliissutigineqartassapput imatut agguataarlugit: Aningaasaateqarfiup aningaasaataasa 60-70 %-ii aktianut aningaasaliissutigineqartassapput, aningaasaateqarfiup aningaasaataasa 25-35 %-ii pappiaqqanut ernialersorneqartartunut (obligationit) aningaasaliissutigineqartassapput, kiisalu aningaasaateqarfiup aningaasaataasa 5 - 8 %-ii illunut aningaasaliissutigineqartassallutik.

Siunnersuummi ataatsimoortumik ilaatigut aallaavigineqarpoq aningaasaateqarfimmi aningaasaatinik aningaasaliissuteqartarnermut aaqqissuussineq, norgemiut uuliamut aningaasaateqarfianni atorneqartoq (Statens Pensjonsfond utland). Ataatsimoortumik innersuussiffigineqarpoq immikkoortoq 2.2.4 nalinginnaasumik oqaaseqaatiniittoq. Norgemiut uuliamut aningaasaateqarfiat assigalugu Kalaallit Nunaata Aatsitassarsiornermi Aningaasaateqarfia piffissamut ungasinnerusumut periarfissaqarpoq, aamma taamaattumik aningaasaateqarfiup iluaqutaasumik ataatsimut isiginnilluni aningaasaliisarnernut nalorninartoqarfiunerusunut aningaasaliisarsinnaavoq, taamaaliornikkut anguniarniarlugu sapinngisamik aningaasaateqarfiup aningaasaataanik iluanaaruteqarsinnaaneq.

Nr. 15-imut (kapitali 15-imi kapitalip qulequtaa)

Inatsisartut inatsisaanni kapitali 15-imi kapitalip qulequtaa allanngortinneqarpoq siunnersuummi nr. 15-imi (§§ 51-52) aalajangersakkat nutaat aningaasaateqarfiup aqunneqarneranut aamma allaffissornermut tunngatillugu, taassuma pisuussutaasa annertuallaannginnerisa nalaani.

Nr. 16-imut (§ 51)

Aalajangersagaq nutaajuvoq Inatsisartut inatsisaannut atuuttumut naleqqiussilluni.

Aalajangersagaq ikaarsaariarnermi aalajangersagaavoq, tassani ilaapput immikkut maleruaqqusat aningaasaateqarfiup aqunneqarneranut aamma allaffissornermut tunngassuteqartut, Inatsisartut inatsisaata atuuttunngortinneqarnerata kingornatigut piffissami sivikinnerusumi imaluunniit sivisunerusumi atuutsinneqartussat, aningaasaateqarfiup pisuussutaasa sulii amerlanngikkallarneranni.

Piffissami Inatsisartut inatsisaata atuuttussanngortinneqarnerata kingornatigut aningaasaateqarfimmi aningaasaatit aamma aatsitassarsiornermit isertitassat amerlavallaannginnissaat naatsorsuutigineqarpoq. Taamaattumik naatsorsuutigineqarpoq piffissami tassani aningaasaateqarfimmit aqutsinermi, ingerlatsinermi aamma allaffissornermi pisariaqartitat annikinnerussasut, Inatsisartut inatsisaanni kapitali 7-ip malitsigisassaa tunngavigalugu. Aaqqissuussinerup taamaattup peqataaffigissavaa qulakkeerinnineq aningaasaateqarfiup aqutsinermut, ingerlatsinermut aamma allaffissornermut aningaasartuutaasa aningaasaateqarfiup pisuussutaasa annertussusiannut naleqqiussilluni naammaginatumik annertussuseqarnissaannik.

Aalajangersakkap ersersippaa inatsimmi kapitali 7-mi aalajangersakkat aatsaat atuutilissasut 31. decembarip tungaanut ukiumi tassaasumi piumasaqaatit tulliuuttut 2 siullerpaamik naammassineqarfigisaanni:

- 1) Aningaasaateqarfiup pisuussutaasa 1 milliardit sinnerpatigit.
- 2) Aningaasaateqarfiup aningaasaataanit ukiumut iluanaarutit 50 millionit koruuninit amerlanerulerpata.

Aatsaat piumasaqaatit 2 taaneqartut marluutillugit naammassineqareerpata siulersuisut aamma allatseqarfik Inatsisartut inatsisaanni kapitali 7-imi maleruaqqusat malillugit pilersinneqassapput. Tassa imaappoq piumasaqaatip ataatsip naammassineqarsimanissaa naammangilaq, tamatumunnga ilanngullugu piumasaqaatip ataatsip naak piffissami sivisuumi naammassineqarsimagaluarpuunniit.

Piumasaqaatit 2 taaneqartut tamarmik marluullutik naammassineqarpata Inatsisartut inatsisaanni kapitali 7 atuutilissaaq, tassani apeqqutaatinnagu piumaqaat ataaseq imaluunniit piumasaqaatit marluk tamarmik ukiumi tullinnguuttumi ataatsimi ukiuniluunniit tulliuuttuni arlalinni naammassineqanngikkaluarpata.

Nr. 16-imut (§ 52, imm. 1)

Aalajangersagaq nutaajuvoq Inatsisartut inatsisaannut atuuttumut naleqqiussilluni.

Aalajangersakkami ersersinneqarpoq ataatsimoortumik aallaavigineqassasoq, kapitali 7-imi aalajangersakkat atuutilernissaasa tungaanut Naalakkersuisut tassaasut aningaasaateqarfimmit aqutsisut, ingerlatsisut aamma nakkutiginnittuusut.

Nr. 16-imut (§ 52, imm. 2)

Aalajangersagaq nutaajuvoq Inatsisartut inatsisaannut atuuttumut naleqqiussilluni.

Aalajangersakkami pineqarpoq Naalakkersuisut tassaasut aningaasaateqarfimmik aqutsisut, ingerlatsisut aamma siulersuisut taassuma siunertaa, Inatsisartut inatsisaat aamma taanna tunngavigalugu maleruaqqusat aalajangersarneqartut naapertorlugit. Ataatsimoortumik aalajangersagaq Inatsisartut inatsisaanni § 22, imm. 1-ip assigaa, tassa siulersuisut aningaasaateqarfimmit aqutsinerat aamma ingerlatsinerat Inatsisartut inatsisaanni kapitali 7 nalinginnaasumik aqqissuussineq naapertorlugu.

Nr. 16-imut (§ 52, imm. 4)

Aalajangersagaq nutaajuvoq inatsisartut inatsisaannut atuuttumut naleqqiussilluni.

Aalajangersagaq naapertorlugu Naalakkersuisut ukiumut qaammatit pingasukkaarlugit tamanut saqqummiussamik nalunaaruteqartassasut paasissutissanik, aningaasaateqarfiup ingerlaneranut aamma ineriartorneranut tunngatillugu sunniuteqarsinnaasut pillugit.

Aalajangersakkat ataatsimoortumik Inatsisartut inatsisaanni § 22, imm. 4 assigaa, tassa siulersuisut ukiumut qaammatit pingasukkaarlugit tamanut saqqummiussamik nalunaaruteqartarnissaannut tunngasup Inatsisartut inatsisaanni kapitali 7 nalinginnaasumik aqqissuussineq naapertorlugu.

§ 2-mut

Aalajangersakkami pineqarpoq siunnersuutip atortuulernissaanut piffissarititaasoq.

Siunnersuutigineqarpoq siunnersuutip 1. januaari 2018-imi atuutilernissaa.